

ADVERTISSEMENT
A L'ASSEMBLEE
DE LA
ROCHELLE.

M. DC. XXI.

Case

F

39

326

162171

THE NEWBERRY

LIBRARY

IN DC. XXI



ADVERTISSEMENT

A L'ASSEMBLEE DE LA ROCHELLE.



ESSIEVRS,

Encor qu'en vostre Asssemblée, il y ait des Theologiens, des Jurisconsultes, & autres personnages qui dotiez de prudence & d'experience, ne peuuent estre suspects d'ignorer les Loix diuines & humaines ; & qu'il semble superflu de vous enuoyer des aduertissemens de loing : Ce neantmoins, ne trouuant assez de harmonie entre les protestations que vous faites de vostre obeïssance au Roy ; & la suite de vos actions & deportemens : voyant que mesmes en vos protestations & remonstrances, qui n'est que de la peinture, on trouue quelques traicts mal-faicts, & des couleurs mal appliquees : J'ay pensé, qu'il pouuoit estre de vous, comme de ceux qui ont bien la veuë assez bonne,

A ij

mais qu'un rideau deuant la fenestre, ou quelque autre chose exterieure, empesche de voir ce qui de foy est fort visible: & que ce n'est pas par ignorance que vous pechez, mais par inaduertance, pour ne regarder assez souuent ce que nostre doctrine & Confession de foy nous represente en assez grosses lettres. Et donc comme pour tirer un rideau, ou pour oster tel autre obstacle, qui empesche l'usage de la veuë, le premier venu y peut seruir, sans qu'il soit besoin d'un Oculiste ou Medecin; ainsi ne me suis-je pas proposé icy de vous enseigner ce que vous ne sçavez pas; mais de vous ramenteuoir ce à quoy vous ne songez pas; adressant ce Discours à vostre Memoire, non à vostre Entendement. Il arriue souuent, qu'un homme ignorant se presente sans temerité ny presumption pour consoler mesme son Pasteur, quoy que fort sçauant, quand il le voit troublé de quelque affliction, & qu'on ne luy puisse rien dire qu'il ne sçache beaucoup mieux qu'un tel Consolateur: & toutesfois ceste consolation deuiant vne espeece d'instruction, au moins pour la Pratique, sans laquelle la Theorique n'est qu'une tablature sans Musique

ny harmonie. Si apres auoir ouï vne bonne Predication, ou leu vn bon liure, nous faisons, comme quand on se leue de la chaire d'un Barbier, à se regarder au miroir pour voir si le poil est bien roigné, en confrontant le Tiltre que nous prenons, avec la vie que nous menons; nostre Reformation auroit plus de grace, & moins besoin d'aduertissemens: mais ie crain, qu'on ne die de nous, comme des Atheniens, qu'ils aimoient l'argent seulement pour le conter, non pour s'en seruir; aussi que nous parlons de Reformation plus pour nous en vanter, que pour nous reformer.

Or ie presupposeray icy comme vn Principe aduoté de tous ceux qui aduoient & recognoissent en eux mesmes, l'infirmité de nostre nature: assauoir; Que nos esprits quelquefois n'apperçoient, ou ne cōsiderent pas assez les choses mesmes les plus manifestes; comme aussi il aduient souuent, que nos yeux ne voyent pas ce qui est à nos pieds, iusques à passer par dessus, ce qui est deuant nos yeux mesmes. Chacun sçait, qu'en traictant avec son prochain, il luy doit autant de candeur & de sincerité, qu'il en requiert de luy; mais l'esperoir d'un grand aduantage

l'esblouit quelquefois de telle sorte, qu'il ne peut ou ne veut voir la lumiere de ceste belle & claire maxime. Chacun veut estre obey & seruy de son valet à poinct nommé, sans luy rendre raison pourquoy il luy commande cecy ou cela; & pense auoir pleine liberté de luy defendre vne chose, que n'agueres il luy auoit permise: mais quand il reçoit quelque commandement de son superieur, qui n'est à son goust; il se fasche, il se tourmente, & n'estime pas estre tenu d'y obeir, ny estimer raisonnable ce commandement, si le superieur ne luy en rend raison, si l'inferieur n'approuue la raison du superieur. Il n'y a donc nul inconuenient d'aduertir son prochain des choses quoy que notoires, quand elles sont necessaires & salutaires; puis que ce n'est pas assez de les auoir vne fois apprinses & comme serrees au cabinet de la memoire; mais qu'il faut aussi les auoir en la main, prestes & promptes pour la pratique & l'exercice: ioinct, que si les choses obscures se peuuent esclaireir par discours; & les douteuses prouuer par raisons; les claires se peuuent rendre encor plus claires par repetitions, & plus efficaieuses, les faisant penetrer iusques aux affections.

Ne trouuez donc pas mauuais, Messieurs, si on vous exhorte à vous ressource-
 nir de tous ces Commandemens de Dieu,
 qui nous recommande du Ciel, l'obeyssance
 que nous deuons à ceux ausquels il
 nous a soubmis en terre. Vous auez ap-
 prins dès vostre ieunesse; *Que resister aux* Rom. 13. 7.
puissances superieures, c'est resister à l'ordon- 1. 2. 5.
nance de Dieu: que ceux qui y resistent feront
venir condamnation sur eux-mesmes: Qu'il 1. Pier. 2. 7.
faut estre subiect, non seulement pour l'ire, mais 13. 18.
aussi pour la conscience, aux maistres, non seule-
ment quand ils sont bons & equitables; mais
aussi aux fascheux. Que ceux ne peuvent ren- Matth. 22.
dre à Dieu ce qui est à Dieu, qui ne rendent à v. 21.
Cesar ce qui est à Cesar; puis que c'est Dieu qui
nous oblige à ce deuoir enuers Cesar.

Nous auions accoustumé cy-deuant de
 battre de tels canons ceux qui se veulent
 exempter de ceste subiection. Nous leur
 disions que tant s'en faut, qu'aucune qua-
 lité ou degré de dignité Ecclesiastique les
 en dispense, que S. Chrysostome, expo-
 sant le passage de S. Paul, (Rom. 13. 1.) y
 oblige mesme les Apostres, les Euangelis-
 tes & les Prophetes, encor que ce fust
 Neron, soubz lequel S. Paul donnoit ce
 precepte aux Chrestiens: Que Iesus Christ

Matth. 17.
v. 27.

Ioan. 19. 7.
10. 11.

Esther cha.
9. v. 4. s. 16.
Dan. 6. 16.
Tertul. ad
Scap. c. 31.

Idem Apo-
log. c. 30.

bien que le Roy des Roys, le Seigneur des Seigneurs, voulut toutesfois s'assubiectionner, non seulement à Tybere, qui ne valoit pas mieux que Neron, en luy payant tribut, mais aussi à Pilate; recognoissant que la puissance que cestuy-cy s'attribuoit de le crucifier, & de le deliurer, luy estoit dōnee d'enhaut. Que Daniel estant esleuë au supreme degre, & comme au Solstice d'honneur en la plus grande Monarchie qui fust lors au mōde, & qui avec ceste authorité & puissance, n'eust manqué de faction & de party (quand il n'y eust eu que le grand nombre des Juifs, qui bien tost apres se vengerent si vigoureusement des Perses, à la faueur d'Esther & de Mardochee) ayma mieux se laisser ietter en la fosse aux lyons, que de troubler l'Estat & le repos public. Que les premiers Chrestiens, apres le temps des Apostres, obeyssioient en toutes choses politiques aux Empereurs, bien que persecuteurs, les honorant comme ceux qui ne cedent qu'à vn seul Dieu, & leur souhaitans vie longue, Empire assésuré, vn Senat fidel, maison seure, vn peuple obeyssant, le reste du monde en repos; bres tout ce qu'un homme, & l'Empereur mesme scauroit souhaitter.

Vous direz que vous en dictes autant en

VOS

vos assemblees, en vos prieres, en vos remonstrances: Ce n'est pas assez de le dire, de faire ceste confession par les levres; il faut monstrier sa foy par les œuvres: autrement on dira que vos propos ressemblent aux Cyprés, qui sont beaux & grands; mais ne portent fruit qui vaille. Ces anciens Chrestiens dont nous parlons, obeyssoyent aussi bien (hors l'impieré) à vn Diocletian Payen, à vn Iulian Apostat; l'un & l'autre leur persecuteur; qu'à vn Constantin leur bien-faicteur. Cependant en apparence ils auoient beaucoup plus de raison pour leur resister, & de moyens pour se cantonner, & s'opposer à ceux qui non seulement leur ostoyent toute liberté d'exercice de leur Religion, mais qui en punissoient la simple confession avec les plus cruels supplices du monde. Voicy comment ils parlent par la bouche de Tertul- Apolog.
lian: *Si nous voulions estre ennemis ouuerts,* c. 37.

manquerions-nous de forces & de gens de guerre? voire comme s'il y auoit plus grand nombre de Mores, ou de Marcomans, ou de Parthes, ou de quelque peuple que ce soit d'un seul pays, qu'il n'y a de Chrestiens par tout le monde. Nous ne sommes venus que depuis hier, par maniere de dire; & cependant nous auons rem-

py tout ce que vous auez : villes , Isles , Chasteaux , bourgades , Communautez , armées , tribus , maisons publiques , la Cour de l'Empereur , le Senat , les Iurisdiction : nous ne vous auons quitté que les temples . Quelle guerre ne pourrions nous soutenir , quand mesmes nous serions en moindre nombre , puis que nous souffrons la mort si allaiement ; n'estoit que nostre profession nous oblige plustost à estre tuez , qu'à tuer . Voire nous nous pouuions combattre sans armes , & sans estre rebelles , seulement en nous separant d' avec vous . Car si vne si grande multitude d' hommes que la nostre se fut retiree en quelque pays estrange , vous eussiez eu honte de faire perte de tant de citoyens : la seule separation vous eust esté punition : vous eussiez esté estonnez de vostre solitude , & eussiez esté contraincts de chercher des gens à qui commander : il vous fust resté plus d' ennemis que de citoyens , &c .

Quand l'Empereur Valentinian le ieune , seduit par sa mere Arrienne , demanda les Eglises à S. Ambroise ; il offrit son bien , son corps , prest à aller en prison , au supplice , plustost que de faire assemblée ou amas de peuple pour resister comme il le pouuoit : Me veut-on contraindre (dit-il) ie ne sçay que c'est que de me defendre . Quand

Orat. cont.
Auxent.

S. Gregoire dict; que s'il eust voulu se mes-
 ler contre les Lombards, il eust eu moyen
 de les chasser d'Italie, & qu'il ne leur fust
 resté, ny Roy, ne Duc, ne Comte, &c. nous
 remarquons vne notable difference entre
 luy, & Gregoire VII. Iules II. & autres
 Papes guerriers: mais nous ne remarquons
 pas celle qui est entre nos peres qui souf-
 froient constamment toutes sortes de sup-
 plices pour la Religion, & leurs enfans, sur-
 prenans des villes, donnans des batailles,
 faisans tout autre acte d'hostilité, pour la
 mesme querelle. La bonté de nos derniers
 Roys, continuee par celuy que Dieu nous
 a donné en sa benediction à present, nous
 a non seulement deliurez de tous les maux
 soufferts par nos Peres; mais comblé de
 tous biens, par l'octroy des villes de seure-
 té, entretenement de garnisons, mesmes
 de nos Pasteurs & Academies; admission
 des nostres aux charges politiques & mili-
 taires; erection des Chambres my-parties,
 &c. Au lieu que du temps de Tertullian, Apolog. c.
 le Chrestien n'aspiroit pas seulement à la ^{46.}
 charge d'Ædile: nous voyons parmy les
 nostres non seulement des Conseillers
 d'Estat, & des Cours de Parlement; mais
 aussi des Ducs & Pairs, des Marechaux de

France, des Gouverneurs de villes, & de Prouinces entieres: & cependant on oyt des cris, des lamentations, des gemissemens plus pitoyables, que du temps de nos peres, quand on les menoit au feu & au gibet. I'enten, que c'est à grand tort, qu'en vos Remonstrances vous vous plaignez du manquement au payement des garnisons & des Pasteurs. Celuy qui est ordonné pour y satisfaire, s'inscrit icy en faux, & declare s'en estre deuëment acquitté. On dict, que vous mesmes en auez retranché vne partie, pour l'employer-aux frais de vostre Assemblée. Vous deuiez donc aussi retrancher ceste partie de vos plaintes. Peut-estre en employez-vous vne autre, à remuer la terre pour remplir vos bastions; ne pouuant remuer le Ciel, comme fit ceste legion fulminatrice composee de Chrestiens, sous l'Empereur Marc Aurele; parce que vos deportemens ne symbolisent non plus avec les leurs, que le Carabinage de vos Bandoliers, avec l'humilité des anciens Martyrs.

Nos vieilles Maximes, qui disent; Que l'Eglise se doit planter par le glaiue spirituel, non par le materiel; Que la Religion se cultiue mieux sous la Croix que sous

les armes: Que les Religieux se monstrent plus reformez en l'affliction, qu'en la prosperité: Que la moisson est plus grande, apres que le champ du Seigneur a esté arrousé d'une pluye de sang: Que le zele est plus pur en la fournaise de persecution, que parmy les delices & les dignitez du monde, &c. Ces vieilles maximes, dis-je, ne sont plus que contes de vieilles: & comme ces belles langues, l'Hebraïque, la Grecque, & la Latine ne s'apprennent plus que par les liures; aussi ces belles sentences ne se trouuent plus en la pratique, & en l'usage de nos gens, ains ne seruent que pour la decoration de quelque presche, selon les occurrences. On faict plus d'estat du bouleuard de l'Euangile qui se void au lieu de vostre Assemblée, que de toutes les armures contenuës & representees en l'Epistre aux Ephesiens chap. 6. les cuirasses de fer sont plus estimees que le hallectret de Iustice; est à craindre qu'en fin les houlettes de nos Pasteurs deuenus Tribuns, ne deuiennent picques de Biscaye, & qu'ils ne quittent la Bible pour prendre le mousquet, l'escritoire pour l'harquebouze.

Mais on nous manque de paroles, dictes

vous, on a anticipé le changement en Bearn; on reuoque la permission de nous assembler, on criminalise l'Assemblée, dõt nous auions pour garands le premier Prince du sang, & le Seigneur le plus chery du Roy. Ie ne veux point entrer en examen de ce qui vous a esté promis ou permis; ie n'ay non plus de curiosité pour le sçauoir, que de vocation pour en informer. Soit ainsi, comme vous le posez: Quand on auroit esgratigné, ou mesmes esbreché l'Edict en beaucoup plus de sortes que ne portent vos plaintes, ny la verité du faict: la parole de Dieu, à laquelle nous nous rapportons tousiours; qui est le seul flambeau pour esclairer nos pieds, pour adresser nos pas; nous apprend que l'Edict de Cyrus faict en faueur des Iuifs, pour rebastir le Temple & la ville de Ierusalem, fut rompu bien tost apres; & fort long temps deuant la mort de Cyrus: Daniel, comme a esté dict cy-dessus, auoit plus d'autorité & de pouuoir en la Monarchie des Peres que nul autre; mais iamais il n'essaya à le faire reestabli ou obseruer par force ou par brauade: il n'eut recours à autres armes, qu'aux larmes, aux ieufnes, & aux prieres. Esdras pouuoit alleguer les mesmes rai-

fons que vous; voire en plus forts termes,
 en reiettant la cause de l'infraction sur les
 Conseillers du Roy, qui en estoient les
 vrayz auteurs: ainsi que nous le lisons en
 son histoire formellement: pour tout cela, *Esd. 4. v. 5.*
 le peuple conduit par Zorobabel, & in-
 struit par Aggee & Zacharie, ne fit ia-
 mais dessein de s'opposer à l'Edict d'Arta-
 xerxes, qui leur estoit contraire, portant
 defense de continuer leurs ouurages. On
 attendit en patience vn autre Edict plus
 fauorable obtenu en fin d'vn autre Roy. *Esd. 6. v. 1.*
 Et quand Nehemie fit resistance aux en-
 nemys, ordonnant que les ouuriers tien-
 droient en vne main la truelle, & l'espee
 en l'autre: il estoit appuyé de l'autorité *Nehem. 4.*
 Royale, contre des Toparches & Gouver- *v. 17.*
 neurs particuliers, ennemys des Iuifs, qui
 vouloient trauerfer & empescher ce que
 le Roy auoit authorisé publiquement.
 Vous pensez espargner le Roy, & garder
 le respect deu à sa Majesté, en declamant
 contre ses Conseillers, en les declarant vos
 ennemis: mais c'est taxer le iugement du
 Souuerain, de blasmer l'election qu'il faict
 de ses Officiers: c'est l'honorer en apparen-
 ce, & l'outrager en effect. Ainsi les soldats
 que Pilate vestirent nostre Seigneur d'escar-

late, & s'agenouïllans deuant luy, le saluerent Roy des Iuifs ; mais en mesme temps le couronnerent d'espines , & luy cracherent au visage. Apres force protestations de vostre obeysance & deuotion au seruice de nostre Roy , vous faictes les Roys vous mesmes , vous enuoyez des mandemens aux Gouverneurs des villes , pour fortifier leurs places ; vous contraignez les habitans à contribuer, vous disposez des finances , &c. Actes qui mettent autant d'espines en la Couronne du Roy que Dieu vous a donné & ordonné ; autant de crachats contre son sacré visage, & contre le Ciel mesmes, d'où ils retomberont sur les vostres , si vous ne preuenez son iustecourroux par vostre serieuse & prompte repentance. Vous voulez estre obeys quand vous commandez aux pauures laboureurs de quitter leur besongne, pour traouiller à vos fortifications ; & ne tenez conte des commandemens de vostre Souuerain, quand il veut qu'un chacun se retire, & se repose en sa maison , & pretendez bâstir celle de Dieu par la rebellion contre ses Lieutenans, sur les mesures de l'autorité Royale. Gardez qu'il ne vous en prenne comme aux Iuifs, lors que sous Iulian
ils

ils voulurent rebastir le Temple de Ierusalem; & que vostre ouurage ne se renuerse sur les ouuriers, accablant les Architectes avec leurs modeles, que les vns demanderoient volontiers à la Suisse, ou à la Holandoise; les autres à la Grecque, par l'establissement de quelques Despotes, Tetrarches, menus Satrapes, & petits Tyranneaux. Tels gouuernemens ouurirent anciennement en Grece le chemin à la domination des Romains, & depuis quelques deux cens ans, l'ont esplanadé à celle du Turc.

Vous voulez que le Roy soit obligé de satisfaire & d'observer de poinct en poinct, tout ce que son predecesseur vous a promis de sa bonne volonté, & de pure grace: Mais vous ne confiderez pas assez, que vous luy deuez toute obeysance par obligation diuine, naturelle, & ciuile. Souuenez vous que nul Roy n'est lié aux ordonnances de ses predecesseurs, non pas mesme aux siennes: autrement il n'auroit pas la puissance de les changer ou casser, selon la necessité des temps, & autres occurrences; ny mesmes de dispenser de telle ou telle loy, celuy de ses subiects que bon luy semble. Aux loix de Dieu, & de

nature il est obligé sans contredit : toutes-
fois s'il luy aduient d'y contreuenir, il n'a
autre Iuge que Dieu: Car toute puissance
& iurisdiction qui est en son Royaume, ne
se peut deriuier que de luy. Dauid Roy &
Prophete nous apprend ceste Theologie,
lequel apres auoir grandement violé l'une
& l'autre loy par son adultere, comblé de
meurtre; confessant son peché, dict ainsi
que nous chantons en nos Eglises:

Psal. 51.

En ta presence à T O Y SE V L i'ay forfaict.
Si est-ce qu'il auoit aussi faict bien grand
tort à son fidel seruiteur Vrie: mais il n'a-
uoit autre Iuge que Dieu pour l'en punir:

*Apol. Dau.
cap. 10.*

Ainsi l'entendoit S. Ambroise: *Dauid, dit-
il, estoit Roy: partant il ne pouuoit estre obligé à
aucune loy; parce que les Roys sont libres des
liens de leurs pechez, car ils ne peuvent estre
punis par les loix, à cause de la puissance de leur
Empire: il n'auoit donc point peché à l'homme,
ne luy estant subiect, ny obligé. Saul auoit
commis choses encor plus enormes con-
tre la loy diuine, non seulement par l'iniu-
ste & opiniaistre persecution contre Da-
uid; mais par l'horrible massacre de si
grand nombre de Sacrificateurs, & par la
cruelle destruction de tout vne ville, où il
n'espargna pas mesmes les femmes, & les*

1. Sam. 22.

petits enfans. Dauid estant desia Roy esleu, & oingt par l'expres commandement de Dieu, auoit plus de vocation & d'autorité, que nul Maire de la Rochelle ou President d'assemblee defenduë: Mais il ayma mieux quitter sa patrie, & se retirer en pays estrange, qu'anticiper le temps que Dieu auoit ordonné pour le mettre en possession du Royaume qu'il luy auoit donné.

Les Ordonnances & les Edicts qui concernent la police, sont de leur nature subiects à diuers changemens: mais l'autorité & puissance de les changer ou reuoker, n'appartenant qu'au Souuerain, il n'y peut estre assujetty luy-mesme. Vray est, qu'il y doit proceder avec grande circonspection & prudence, visant tousiours au bien & au salut public, qui est la souueraine loy: mais s'il luy aduient de se mesprendre, il n'a pour cela aucun Iuge en toute la terre; autrement il ne seroit plus Souuerain. Les verifications de ses Edicts aux Parlemens, ne sont pas marques de quelque autorité collaterale; mais preuues de la fidelité de ses officiers, qui attestent qu'il n'y a rien qui ne soit pour le bien du Roy & du Royaume. Si donc il a

eu raison de vous promettre ou permettre quelque chose, il y a six mois ; vostre deuoir est de croire, qu'il n'en a pas moins maintenant à la vous defendre : & pour cela il ne peut non plus estre blasmé d'inconstance, qu'un bon Pilote qui change tantost les voiles, tantost la route, selon la necessité. Vne loy ne doit pas raisonner ou argumenter, elle n'est pas donnée pour nous rendre sçauans, mais pour nous rendre obeyssans : il suffit que le Legislateur en sçache la raison, sans qu'il la nous declare. Le Roy vous laisse l'usage de ceste liberté en vos maisons, à l'endroit de vos seruiteurs, de vos enfans, de vos propres femmes : vous leur ordonnez & commandez ce qu'il vous plaist, sans y adiouster tousiours le pourquoy : Et vous ne luy permettez le mesme au gouuernement de son Estat, dont il n'est responsable qu'à Dieu & à sa conscience ! quelle audace ! il vous desplaist d'estre criminalisez : c'est du crime dont il faut auoir desplaisir & horreur, non de l'accusation. Vous vous estes assemblez apres la defense faicte : vous foulez aux pieds la sacree autorité de celuy, qui seul vous peut commander & defendre ce qu'en telles

occasions vous deuez faire, ou laisser. Rien ne touche icy la liberté des cōsciences, ny l'exercice de la Religion. Il n'y a article en nostre Confession de foy, ny au Symbole des Apostres, ny texte en l'Euan-gile qui autorise, ou qui concerne telles assemblees; qui ne les condamne, au lieu de les conuoquer. Sa Majesté de sa pure grace nous permet les Ecclesiastiques ordinaires, & en certain temps des politiques extraordinaires. Et quand elle reuo-querait son Edict tant pour les vnes comme pour les autres; la doctrine que nous professons, ne nous permettroit pas pour cela de reuoquer en doute l'obeyssance que nous luy deuons: Si vous ne nous monstrez de textes aussi exprés pour la resistance, que nous en auons cy-dessus allegué pour la submission. Nos Synodes nationaux auoient de coustume cy-de-uant, de faire vne deputation au Roy pour confirmer & renoueller à sa Majesté les protestations de ce deuoir au nom de toutes les Eglises. Le dernier tenu à Ales, depuis vn mois ou enuiron, apres auoir delibéré six ou sept iours s'il le falloit faire, a conclu en fin de n'en rien faire: & ce, pour commencer à se venger de ce qui s'est pas-

se en Bearn. Que si le Roy là dessus vou-
loit conclurre à son tour ; qu'il ne faut
plus souffrir en son Estat telles Assem-
blees, où se font telles deliberations &
conclusions ; il ne feroit que faire sentir la
pointe de sa iuste seuerité, à ceux qui abu-
sent & mesprisent si indignement les
fruits de sa bonté & clemence. La seule
deliberation sur telle chose, est rebellion
manifeste. C'estoit ce que disoit Mucian à
Vespasian: *Qui deliberant, desciuerunt.* No-
stre Roy, apres auoir longuement souffert
les refus de ses gracieux offres à ses sub-
iects de Bearn, leur laisse à ceste heure au-
tant de loisir pour deplorer leur opinia-
streté, qu'auparauant ils prenoient de pei-
ne pour luy en donner, & s'en procurer
pour eux-mesmes à l'aduenir. S'ils ont
esté poussez de mouuement de Religion,
ou de doute de leurs assignations, ie m'en
rapporte : mais puis que du temps du feu
Roy, ils receurent bien la Messe, bannie
du pays depuis vn long temps ; quelqu'un
pourroit penser, qu'en ces dernieres con-
testations, il y a eu plus de soing du tempo-
rel, que de zele pour le spirituel. Quoy que
ce soit, nous voyons que le long repos a
engendré vne grande intemperie tant au

Tacit. hist.
lib. 2.

commun de nostre corps, comme en la plus-part de ses membres.

A Charenton on void des espouses qui portent leurs patrimoines pendus aux aureilles, ou sur la gorge aussi bien que celles dont parle Seneque. Cet excès est accompagné de festins, qui ont beaucoup plus de conformité avec les banquets des Pontifes Payens, qu'avec les Agapes des premiers Chrestiens. Telles folies se laissent boire, & se pourront guarir par quelque diette & disette: & s'il est question de se refugier en Suisse, ou à Geneue, les vns se purgeront la bourse, cependant que les autres se font tirer du sang. Mais c'est pitié de voir ceste manie publique: faire des Assemblies illicites; rendre telles, mesmes celles, que la permission du Roy faisoit licites; où se font ces folles deliberations, où se prennent ces malheureuses conclusions: munir les places, choisir des Capitaines, se preparer en fin à la guerre, sans, & contre la volonté du Souuerain, auquel seul Dieu a donné le glaue: Ce sont des folies qui ont plus besoin de Ciguë, que de Hellebore; de Commissaires, que de Curateurs: ie ne sçay si celuy qui presidoit n'aguères en ce corps cacochyme d'Ales,

Prouerb.
28.7.1.

sentant ceste discriasie en sa propre teste, s'est ordonné luy-mesme vn changement d'air plustost que d'humeur. On ne sçait, pourquoy il est en fuite. Bien sçait-on, ce que dict le Sage; *Que le meschant fuit, sans que personne le poursuiue.* C'est ce qui augmente l'estonnement en ceux qui ne le mettront iamais de ce nombre.

Au reste, il faut que ie vous die, Messieurs, que si vostre obeyssance au Roy, ne consiste qu'en paroles sans effect, en fueilles sans fruct; vostre charité enuers vos freres logez de decà le Iordain, ne leur mōstre pas seulement des fueilles. Quand vous aurez allumé le feu par delà, la fumee qui s'en espandra au long & au large, fera pleurer amerement plus de trois cens mille personnes de decà la riuere de Loire. Adioustez-y le peril spirituel, quand au lieu de trois proselytes que vous ferez de delà, vous ferez icy plus de trois cens hypocrites ou Epicuriens, priuez d'une Religion, & desgoustez de l'autre. Et qu'au lieu d'abolir ou diminuer quelque superstition, vous multiplierez & prouignerez l'Atheisme, cent fois pire que nulle superstition; comme l'anarchie est plus detestable que la plus grande tyrannie. Cecy doit
faire

faire comprendre à vostre Assemblée aussi bien qu'à ceux de l'Eglise Romaine, qu'au moins vne partie des Huguenots ne peut non plus approuuer vos actions, que profiter aux euenemens dont elles nous menacent. Si ceste partie est la moindre, aussi est-ce la plus saine, la plus ferme & resoluë à insister & persister immuablement en la fidelité & obeyssance de son Souuerain.

Estimez-vous peu de chose, de donner non seulement occasion, mais cause & sujet suffisant pour faire vn Schisme en la conduite de nos affaires politiques, qui pourra bien estre fuiuy d'un autre en la Religion, si vous considerez les altercats & disputes n'agueres esmeuës au Synode d'Ales, sur la réception ou rejection des Canons de Dordrech, & du liure du sieur du Moulin sur ceste matiere? Vous sçauiez qu'il se presenta vn Ministre, & des plus habiles que nous ayons : soustenant que ce liure contenoit heresie, & s'offrant à le prouuer : encor que le grand nombre l'ait lors emporté, si est-ce que le petit pourra croistre, & le grand diminuer. Desia i'enten que plusieurs se plaignent du formulaire de ce serment, qu'on pretend d'ores-

nauant exiger de tous les Ministres. Plusieurs n'attendent que l'occasion pour remuer ceste Camarine. Non seulement les nostres, mais aussi quelques Catholiques Romains se sont plaints autre fois de ce que l'administration des affaires d'Etat, a esté entre les mains des Prelats: alleguans plusieurs exemples que nous lisons dans nostre Histoire.

Mais vous n'avez moins de sujet en vos assemblees, de prendre garde aux Ministres, que les Venitiens à en esloigner les Prestres. En celle de Saumur l'an 1611. les plus grands d'entre les nostres, le iugerent ainsi. Le zele de quelques-vns de ceste robe, n'est que fureur; & la presumption de leur sagesse, est la plus dangereuse folle qui soit. Ils ne peuuent deuenir sages, parce qu'ils se persuadent de l'estre en perfection. Le Genie de telles gens a mis en combustion l'Holande; & le traitement qu'ils y ont fait faire à leurs compagnons, qui ne pouuoient souscrire à toutes leurs opinions; iustifie les plus aspres persecutions que les nostres souffrirent iamais sous les Princes Catholiques Romains, sans en excepter le Pape. Cy deuant nous disions; que la Religion se doit persuader,

sans forcer, qu'elle entre mieux és esprits en enseignant, qu'en commandant; en exhortant, qu'en menaçant: que nul tourment du corps, n'imprime meilleur sentiment à l'ame. Nous approuuions grandement ce passage de Lactance, qui se plaignant des Payens dit: *Ils employent la force pour se faire croire, bien qu'elle soit ennemie de la verité. Cela leur arrive, pource que prenans Superstition pour Religion, ils se trompent aussi aux moyens de la conseruer. La Religion ne fructifie pas en tuant, mais en mourant: ne se maintient pas dans la cruauté, mais par patience; non de perfidie, mais par foy: Aux meschans à commettre telles laschetes; aux gens de bien à pratiquer les vertus contraires. Si tu arrouses de sang la Religion, si tu la cultiues par tourmens; si tu la maintiens par tyrannie: ce n'est plus la maintenir; c'est la souiller; c'est la violer: Car il n'y a chose si volontaire, que la Religion, en laquelle, si le cœur, de qui la professe est contraint; ce n'est plus Religion, c'est contrainte, &c.*

Le Serenissime Roy de la grand' Bretagne, comme il a cognu dès le berceau ces Puritains; ainsi les a-il depeint de leurs couleurs, & pourueu selon sa prudence, qu'ils n'ayent pas tant de moyen, que de

volonté, à troubler ses affaires. C'est à vous, Messieurs, de prendre garde, à ce que les plaintes que vous faictes touchant les Sermons de quelques Curez, ne soient iustement renuoyees & retorquees sur les Presches de vos Ministres; & que nostre Reformation ne se termine plustost en imitation de ce que nous auons tant redargué, qu'en reestablissement de la pureté tant promise d'un costé, & attendue de l'autre: & que ceux qui la cherchent dans nos œuures, & ne la trouuent que dans nos liures, ou au bout des levres; ne disent que l'Eglise que nous appellons Reformee, ressemble aux boites des Droguistes, qui ont de beaux escreteaux par dehors, mais s'il y a quelque peu de bon onguent au dedans, il y a bien de l'ordure meslee parmy, & des drogues bien esuentees.

Tenez donc pour certain, que ne plus ne moins, que nous, qui sommes de deça, tenons la Royauté pour la plus excellente & la plus parfaicte forme de gouuernement qui soit au monde; aussi demeurerons-nous inseparablement attachez à l'obéissance & fidelité de nostre Roy, sans rien excepter, sinon ce que le Roy des Roys se reserue, & que celuy qui nous re-

presente cy bas son image, ne nous veut pas oster, nous en permettant l'exercice exterieur & public aussi libre, que le sentiment interieur, qui ne se peut oster ny changer autrement que par raison & persuasion. Nous recognoissons, & recognoissons tant que nous respirerons ceste grace que S. M. nous oëtroye, & la supplions tres-humblement, de ne la point reuoquer pour l'ingratitude de ceux qui s'en rendent indignes: esperans aussi que sa Iustice ne luy permettra pas de faire participer à la peine ceux qui n'ont nulle part à la coulpe: n'estant raisonnable, que ceux qui n'ont point mangé l'aigret, ayent les dents agassees, comme d'autres qui ne peuuent digerer les fumees que le grand aise, & la vaine confiance de leurs murailles, enuoye aux cerueaux plus creux, que leurs fossez. Quelque mutin dira; que c'est la peur qui nous fait parler ainsi: ie luy respon; que l'audace & la temerité sont les auant-coureurs de calamité: que nul n'est si tost atterré, que celuy qui n'a rien apprehendé. L'apprehension & l'affliction ne suggerent pas tousiours les plus mauuais conseils: mais bien souuent il y a du combat entre la prosperité, & la sagesse.

se. Grand heur, & grand iugement ne lo-
gent pas tousiours ensemble. C'est pour-
quoy nostre aduis ne doit pas estre mes-
prisé, quand mesmes vne iuste crainte au-
roit enfanté comme mere, ce que la raison
diuine & humaine a engendré comme
pere. Le dommage nous rend sages; le
torrent d'une grande felicité emporte
quelquefois les plus saines & salutaires
opinions.

Que si nonobstant les protestations
de nostre fidelité au Roy, conforme à nos
actions; Dieu veut, pour nos autres pe-
chez, nous enueloper au chastiment com-
mun; on ne lairra pourtant de discerner
ceux qui ont porté de l'eau pour esteindre
ce feu, d'auec les autres, qui y versent de
l'huile pour l'augmenter; Par la secouffe
d'un semblable mouuement, la bouë ren-
dra de la puanteur, & le parfum vne odeur
agreable.

F I N.



